



鼻公空烏撇个歲月

燒暖帶溼氣个南風，一陣一陣對大樓个屋側角，對樹尾吹過來，吹走幾下日來个清冷，帶走寒个感覺。用嘴、用鼻公，俚大口大口吞食這燒暖个空氣，雙手打開，俚浸在今年第一擺个南風肚，歡喜个心情跔目珠、嘴角散出來，斯像這陣風，塞淦歸屋間。哦！春天來哩啲！

溼潤个燒風喊醒萬物，櫻花一接著訊息，該捫歸冬个花苞，慢慢、慢慢，「啖！」講通合个樣，一暗晡等，斯總開花咧！媒體一報，各地有花个所在，斯有鬥鬧熱个人潮。擇一個好日，俚同一陣學音樂个朋友共下坐火車，去賞花景點之一——泰安遊寮，乜想學文人雅士共樣，在靚靚个樹下，品茶奏樂。

火車推啊推，情感牽啊牽，窗門外个田坵，天頂悠悠个雲，帶俚轉到花樣个年歲。該年，正畢業，爰分發該下，屋家附近鄉鎮做下無開缺，恁堵好斯泰安有缺，國泰民安看起來毋會嬾，還過有火車也有巴士做交通工具，手一比，斯同泰安結緣咧！等到報到時正知，阿姆哀！泰安係小站，火車一點鐘單淨一枋，上下班時節盡加也無超過兩枋，有巴士，毋過一點鐘久正有一枋，還愛迴后里迴到毋記得。唉！還係乖乘坐火車較適當。

斯恁泥，開始日日坐火車上下班个日咧。舊山線个鐵支路同地泥較親，貼核地，一路開展，斯像大地个筋路。窗門打開，鼻得著花草、泥肉个香，風用厥天然个梳替俚輕輕梳妝，清涼个感受，係俚逐朝脣个清茶、臨暗時个安慰劑。燒炭个火車過磅空，係難忘个回憶，一聲長長个「嗚——」通知愛過磅空咧，窗門毋赴放落來，外背个烏摻核徑鼻个燒炭味瑞，斯在車廂肚遊遊野野咧！一個磅空過撇還過一個，光景斯在明、暗之間變化。日頭帶來个光，分人開朗快活，磅空个烏，分人有希望，分人期待續落來个光明。這下恁起來正知，哦！原來吾个人生觀，斯在當時明、暗之間，體會出來个啦！

「嗚——」一日兩掖个慢車時間，係幸福个，日日俚享受該慢慢推到泰安个悠閒。臨暗時个目睡鳥，在火車輪个伴奏下，更加放勢閑翼，佢飛出窗門外，飛到田坵肚碾觔斗，飛上天頂同霞痕搞园人尋。轉到屋家，面一掙，鼻公空一清，面帕項係烏烏个一層。

作者：劉玉蕉

☆詞彙學習☆

- | | |
|------------------------------------|--------------------------|
| 【講通合】gong` tung+ fo`：約定好。 | 【徑鼻】gang` pi`：指味道刺鼻難聞。 |
| 【一暗晡等】rhid` am` bu+ nen`：一個晚上而已。 | 【續落來】sua` log` loi`：接下來。 |
| 【推啊推】kog` a+ kog`：形容火車輪子搖搖晃晃發出的聲音。 | 【掖】rhe`：此處指車班。 |
| 【盡加】cin` ga+：最多。 | 【放勢】fong` she`：盡情的。 |
| 【迴】fui+：繞、轉圈子。 | 【碾觔斗】zan` kin` deu`：翻筋斗。 |
| | 【霞痕】ha` fin`：傍晚的彩霞。 |

☆文法學習☆

【迴到毋記得】fui+ do` m` gi` ded`：繞很久。「V_{動詞} + 到毋記得」字面義為「V_{動詞}到忘記」，意指動作進行的時間持續而長久，久到快要忘記有這回事的地步。
例：阿良牯食飯傍電視，一碗飯忒等斯食到毋記得。（阿良吃飯配電視，光一碗飯就吃很久。）